




VIII GOVERNO CONSTITUCIONAL
MINISTÉRIO DA EDUCAÇÃO, JUVENTUDE E DESPORTO



KOMUNIKADU IMPRENSA

21 fulan-marsu, 2020

Determinasaun Feriadu Ekstraordináriu iha eskola sira hotu iha Timór laran tomak durante
23 – 28 Marsu 2020

Ohin loron, 22 Marsu 2020, Ministra Edukasaun, Juventude no Desportu, hafoin koordena ho Gabinete Primeiru Ministru no Ministériu Saúde, determina feriadu ekstraordináriu hahú loron 23 Marsu to'o loron 28 Marsu ba eskola públiku hotu no eskola privadu sira-ne'ebé integra iha rede pública (Eskola Katóliku sira no Fundasaun), liuhosi Despaxu Ministeriál nú. 9/GM-MEJD/III/2020.

Desizaun ne'e hala'o iha mahon kompeténsia Ministra Edukasaun, Juventude no Desportu nian relasiona ho determinasaun ba kalendáriu eskolár, bazeia ba artigu 5 Dekretu-Lei n. 3/2015, 14 Janeiro no Dekretu-Lei nú. 4/2015, 14 Janeiro.

Ministériu Edukasaun, Juventude no Desportu sei dezenvolve hela métodu ensinu-aprendizajen hosi distáncia, no espera sei bele hahú implementa semana oin.

Tuir rekomendasaun hosi *Ministério da Saúde*, hakarak enfatiza katak FÉRIA ESKOLÁR semana 23-28 fulan-marsu LA'ÓS ATU HALIMAR, MAIBÉ ATU HELA IHA UMA no HALO TUIR padraun ijlene nian ne'ebé fó sai ona iha MEJD nia Circular 3/2020 no regra ofisiál sira hosi *Ministério da Saúde*. Medida fó férias semana ida hanesan maneira ida atu evita ema barak halibur iha fatin ida. Nune'e husu inan-aman no mahein sira hotu nia komprensaun, no BANDU oan atu la'o halimar iha dalan.

MEJD kontinua halo koordenasaun metin ho *Ministério da Saúde* no Ministériu relevante sira seluk, hodi asegura katak sistema edukasaun apoia seguransa no saúde ema hotu.

Halo favór mantein kalma, fiar ba NA'I Maromak, no fó kuidadu ba isin. HUSU BA ESTUDANTE SIRA DESKANSÁ barak, han hahán tasak didi'ak, fase liman beibeik, no evita kaer liman, re'i malu, bensa, no kontaktu fíziku sira seluk. Keta tafui malus iha rai. No importante liu, goza no aproveita tempu hamutuk nu'udar família. Konta istória família nian, halo to'os familiár, kanta hamutuk, no apresia no hatudu domin ba malu iha família nia leet.

BAINHIRA SENTE ME'AR MARAN KA FANI HO ISIN-MANAS FAVÓR KONTAKTU KLÍNICA, OSPITÁL KA PESOÁL SAÚDE SIRA.

MEJD SEI AVALIA LORON FERIADU HAFOIN REMATA HODI FÓ-HATENE FILAFALI BA INAN-AMAN NO MAHEIN SIRA.

Obrigada barak, no Maromak haraik bensa ba ita hotu.
Dili, 21 fulan-marsu, 2020